

Siunnersuut: Qamutit motorillit uulia tunngavigalugu atuinngitsut eqqunneqarneranni, motorinullu akitsuuserneqanngikkallarnissaannut Inatsisartut inatsisissaattut siunnersuut nr. xx xxxx. 2010-meersoq.

Saqqummiussissut

(Aningaasaqarnermut Naalakkersuisoq)

Siullermeerneqarnera

Naalakkersuisut sinnerlugit qamutit motorillit uulia tunngavigalugu atuinngitsut eqqunneqarneranni, motorinullu akitsuuserneqanngikkallarnissaannut siunnersuut matumuuna saqqummiutissavara.

Qamutit motorillit uulia tunngaviginagu ingerlatillit eqqunneqarneranni, motorinullu piffissami misileraaffimmi ukiunik sisamanik sivisussuseqartussami akitsuuserneqanngikkallarnissaat aalajangigassanngorlugu UPA 2009/23 tunngavigalugu Inatsisartut oqallisigaat. Nalinginnarmik taaneqartartut qamutit innaallagissamik brintimillu ingerlatillit.

Nuup illoqarfittut pingaarnepaatut nunarsuarmi CO2-mik mingutsitsinnginnerpaatut inissinnissaanut siunnersuummi anguniarneqarpoq.

Qamutit paarlakaajaallugit innaallagissamik, uulialu tunngavigalugu atuisut akitsuusinnginneqar-nissat ilanngullugu Naalakkersuisut isumaliutersuutigisimavaat. Naalakkersuisut aalajangerpaat qamutit taamatut ingerlatillit inatsissatut siunnersuummi uani ilanngunneqannginnissaat. Tamatumunnga tunuliaqutaavoq qamutit pineqartut innaallagissamik brintimillu ingerlatillit, saniatigut aamarsuit, uuliap, issup, gassillu sananeqaataannik ingerlateqarsinnaaneri. Qanorluunniit inatsisigtigut piumasaqaraluaaraanni maannangaaq qamutit tamakku ulluinnarni suut ingerlatigineraat nakkutiginissaat ajornakusoorpoq.

Qamutit motorillit siunissami politikkikkut qanoq isummerfiginissaannut, qamutit innaallagissamik brintimillu, aammalu paarlakaajaallugit innaallagialu, uulialu tunngavigisarlugu ingerlatigisallit ineriartortinneqarneri piffissami misileraavimmi Naalakkersuisut malinnaavigissavaat.

Matumuuna siunnersuuteqartoq qutsaviginiarpara, oqallisissiaq pingaaruteqartoq UKA 2009-mi oqallisigineqartoq Inatsisartullu isumaqatigiillutik tapersersugaat pillugu. Tamatumunnga takussutissaavoq nunatta avatangiisaa Inatsisartunit eqqumaffigineqarnera.

Taamatut oqaaseqarlunga Naalakkersuisut sinnerlugit siunnersuut Inatsisartunut piumassuseqarluar-tunut oqaluuserisassanngortippara, aappassaaneerneqannginneranilu Akileraarnermut Akitsuusiinermullu Ataatsimiitsitaliamut ingelateqqitassanngorlugu.